

Kalesia
Naoa itəm Pol təməte tuwın kəm
iəfak mın ikın Kalesia
Nəghatən əkuəkir rəha naoa u
Kalesia

?Pah təməte naoa u? Aposol Pol təməte naoa u.

?Təməte tatuwın kəm pah? Təməte tatuwın kəm niməfak mın itəm kotatig pis ikın e nıtən Kalesia, inu Ikoniam, Listra, ne Tepe. Pol in təmətuoun niməfak mın əh nian in təmaupən maliwək e rəhan naliwəkən mın.

? Nəmegəhən tahro nulan nian təməte? Nəratən asol kit e niməfak e nian əh rəha Pol. Netəm Iaihlua tepət koatən nıpahrienən e Iesu Kristo. Kən netəm Isrel tepət koatən nıpahrienən e Iesu. Məto netəm Isrel neen koatən məmə Iaihlua mın itəm kotən nıpahrienən e Iesu, okotəkəike kətəu-pən lou mın rəha Moses, tahmen e nəhg-ipənən. İlat kəmoatən məmə Iaihlua mın okəkəike kəhg-ipən ilat okəmə kotalkeike məmə okotuwa kətuatip e nıganəmti Uhgın.

? Təməte naoa u o naka? Pol in təməte naoa u, məmə otəg-ətuatip-in nətəligən rəha netəm Isrel itəm koatən məmə Iaihlua mın okotəkəike kətəu-pən lou rəha Moses okəmə ilat kotalkeike məmə Uhgın in otosmegəh ilat. Pol tolkeike məmə iəfak mın okotıtun məmə nahatətən in suatip itəm Uhgın təmöl məmə etəmim otətuatip e nıganəmtın, kən in tatosmegəh ilat e nıkin agien. Məto nolən rəha nəhg-ipənən, o nolən rəha wək əskasik mın, o nolən rəha nətəu-pənən

lou, kəsotomegəhən etəmim. Netəm-iasol rəha niməfak rəha Isrel kəmoatəpələh əpəh Jerusalem moatəghat-in nətəligənən mīn əh. Kən moatən məmə təwīr əm məmə Iaihlua mīn okəsotətəupənən lou rəha Moses. Afīn e Wək Mīn 15:1-35.

Pol təmatuoun matəghat kəm ilat

¹⁻² Piak mīn ne wīnik mīn itəm nəkoatəfak latuənu pīsīn pīsīn mīn ikīn Kalesia, io Pol, io aposol kit rəha Uhgīn, ekatəte naoa u, mītahī-īpīnə kəm itəmat. Io ne piatat mīn neen itəm koatəfak u ikīn-u, ekotolkeike məmə ekotən “təwīr” kəm itəmat. Io u inu, itəm Iesu Kristo ne Tata Uhgīn kəmiāləs-īpər io məmə io rəhalau aposol. Uhgīn u, in təmīləs-īpər Iesu taiir-pa mīn e rəhan nīmīsən. Sənəmə etəmim əpnapīn əm kit təmaun-in io kən mīləs-īpər io, məto Uhgīn. !Tol nəhlān, onəkotəkəike motəto!

³ Pəs Uhgīn, u Tata rəhatat, ne Iesu Kristo, u Iərəməərə rəhatat, ilau okuawte-in nəwīrən rəhalau kəm itəmat kən muələhəu nəməlinuən tətatiḡ otəmat. ⁴ Iesu Kristo təmegəhan-in atīp məmə in otīmīs o nolən rat rəhatat, kən miuw rəkīs itat e nolən rat mīn ne nətəligən rat mīn rəha nətueintən. In təmīmīs məto-inu Tata Uhgīn tolkeike məmə in otol mihīn. ⁵ Tol nəhlān, təwīr mə kitat okotənwiwi pīk Uhgīn u rəhatat, tatuwīn, matuwīn, namnun tikə. Əwəh. Pəs otol mihīn.

Namnusən Təwīr kitiəh əm

⁶ Narmək təmiwig pīk otəmat məto-inu roiu aḡin-əh huə Uhgīn təmaun-in pap itəmat e nəwīrən rəha Iesu, təmawte-in-pīnə əpnapīn əm kəm itəmat. Məto roiu itəmat nakotapəs Uhgīn, moatagiḡm,

moatətəu-pən nəghatən eiueiua min. ⁷ Nəghatən min əh sənəmə Namnusən Təwir rəha Uhgın. Netəmim neen kəmotəuhlin Namnusən Təwir rəha Uhgın moatən in pisin, kən katən məmə in namnusən təwir, kən katiuw kalin itəmat lan, kən katərəkın rəhatəmat nətəligən lan. !Məto Namnusən Təwir kitiəh əm, kən kit min tikə! ⁸ Nat əpnəpın okəmə io, o nagelo kit rəha nego e neai tətəmnus-iarəp nəghatən pisin kit min, itəm təsahmenən e inun emotən-iarəp rəkis kəm itəmat aupən, pəs Uhgın otıləs-ipən e Nigəm Asol. ⁹ Kən ekisimatip min, matən məmə, okəmə suah kit otəmnus-iarəp nəghatən pisin u, təsahmenən e Namnusən Təwir itəm itəmat nınəmotitun rəkis, pəs Uhgın otıləs-ipən e Nigəm Asol.

¹⁰ Rəhak nəghatən əh in təkəsik, kən nat əpnəpın əm okəmə netəmim neen kəsotagienən ron io. Iakolkeike əm məmə niki Uhgın otagien o nəghatən rəhak. Okəmə iatəghat əh məmə netəmim neen nikilat otagien ron io, kən ko sənəmə io iolwək pahrien kit rəha Kristo.

Uhgın Təmaun-in Pol

¹¹ Piak min ne winik min, ekolkeike mə ekən-ipinə ətuatip kəm itəmat məmə Namnusən Təwir itəm iatən-iarəp nian rafin sənəmə nat kit itəm təmisi-pən e nətəligən rəha etəmim əm.

¹² Namnusən Təwir u, sənəmə suah kit təmos-ipa kəm io, kən məgətun io lan, məto Iesu Kristo əm in təmerəh e rəhk-kapə.

¹³ Itəmat nınəmotitun rəkis rəhak nolən min itəm ematol aupən e nian ematəfak itimat netəm Isrel.

1:7: Wək 15:1,24

1:8: 1 Kor 16:22

1:10: 1 Tes 2:4

1:11:

Mat 16:17

Kən emən mə oekoh rafin netəmim mīn rəha Iesu, mərəkin-ərəkin aḡin niməfak, kən matol nalpīnən əskasik kəm ilat. ¹⁴ E nian əh, io ematətul-iəkis o nəukət kastom rəha netəm Isrel, itəm rəhak pipi mīn kəmotəḡətun io lan aupən. Emitun taprəkis-in io mīn neen, itəm emotaiir ahmen.

¹⁵ Nat əpnapīn ematərəkin pap rəhan mīn netəmim, məto Uhgīn təmasəkitun io. Aupən ikin təmitəpun kən mawle rəkis io e nian emətatig əh e nərpī rəhak mama. Kən təmuwa e nian ətuatip rəhan, in təmaun-in io mə ekuwa io, rəhan etəmim. ¹⁶ Kən Uhgīn təmerəh e rəhk-kapə, məḡətun io e nətīn Iesu, məmə oekitun wīr in, kən muwīn mamnus-iarəp Namnusən Təwīr rəhan kəm netəm mīn u sənəmə ilat netəm Isrel, katən ilat məmə Iaihlua mīn. E nian əh, io eməsuwīnən mehm suah kit mə otəḡətun io e Namnusən Təwīr əh. ¹⁷ Kən io eməsuwīnən əpəh ilis Jerusalem məmə oekəhm netəm mīn u kəmoatol aposol aupən. Eməsuwīnən mə okotəḡətun io e Namnusən Təwīr rəha Iesu. E nian əh, io eməsou-pis-pən əpəh ikin kit Arepia, kən matig mitəlig-pa mīn muwīn əm latuənu kit, nərgīn u Tamaskes. ¹⁸ Matuwīn, matuwīn nup kīsil kīnəhaluwa mīnəhaluwīn rəkis un, kən io ematig mitəlig-pən mīn Jerusalem məmə ekehm Pita. Kən eməsətigən tuwəh, emuatig mios nian fiftin əm. ¹⁹ Kən e nian əh, emehm əm Jemes u, pia Iesu, Iərəməərə rəhatat, məto eməsəplanən aposol mīn u neen. ²⁰ Iatən pahrien e nīḡanəmti Uhgīn məmə nəḡhatən u, nīpahrienən, sənəmə neiuən.

1:13: Wək 8:3**1:14:** Wək 22:3**1:15:** Aes 49:1; Kal 2:7**1:18:** Wək 9:26-27

21-22 Eməsatiğən tuwəh əpəh ilis Jerusalem. Kən uarisig un, emuwın əpəh nitən Siria ne Silisia. Kən e nian əh, netəmim itəm koatəfak kəm Kristo latuənu pisin pisin min nitən Jutia, (nitən asol rəha Jerusalem), ilat kəməsotəplanən əh io motəruru niğənəmtək. ²³ Məto kəmoatəto əm namnusən u, netəmim neen kəmoatən məmə, “Suah əpəh in əpəh, rəhatat tikiwir, təmatoh itat o nəfakən, matərəkin nəmegəhən rəhatat, kən mətalkut məmə otərəkin min rəhatat nahatətəən. Məto roiu əh, in min tınatən-iarəp Namnusən Təwir rəha Iesu.” ²⁴ Kən ilat kəmotənwiwi pik Uhgın o natimnat min itəm in təmol e rəhak nəmegəhən, in təməuhlin-pa io ekol nulan.

2

Aposol min neen kəmotegəhan-in wək rəha Pol

1-2 Tatuwin, matuwın minos nup fotin tinuwa minuwın rəkis un, kən Uhgın təmən-ipa kəm io məmə ekəike mitalig-pən min əpəh ilis Jerusalem. Kən itimlau Panapas emian kən miat Taetas itiməhal min məhaluwın. Kən eməhaluwın kiet-arəpən Jerusalem, emotuəfimin itimat netəm-iasol min əm rəha niməfak. Nian emotəpələh e nuəfiminən əh, io ematən-ipən wir nəghatən min itəm ekuwin matən-iarəp kəm Iaihlua min, ilat sənəmə netəm Isrel. Emən-ipən wir natimnat min rafin agin kəm ilat məto-inu esolkeikeən məmə nikilat otəht məmə rəhak nəghatən təsətuatipən, kən moatən rat rəhak wək, tol nat əpnarın əm lan, noan tikə. ³ Kən e nian əh, nikik təmatəht pik məmə kətah okotəhai io mə ekəike mən-ipən kəm

Iaihlua min, mamə okəike kəhg-ipən ilat. Məto kəməsotənən. Kən io kit u, Taetas, in etəm Kris, sənəmə etəm Isrel, kəsəhg-ipənən əh. Məto ilat kəməsotənən mə okəike kəhg-ipən.

⁴ Nənən rəha nəhg-ipənən təmişipən e netənim neen kəmoateiuə əm mamə ilat piatat min. Kən ilat kəmotalkəlik wır mamə okotehm-tu mamə itimat ekoatətəu-pən əh Lou, o kəp. Məto itimat enotiet rəkis minotuwın o Iesu Kristo, kən minotol kitiah itimat min, kən itimat sənəmə slef rəha Lou. Məto netəm min əh, nikilat təməsagienən o rəhatimat nəghatən min, kən motolkeike mamə okotəgo-pən itat rafin e Lou ne kastom rəha nəfakən rəha netəm Isrel. Kən kəmotən mamə okəike kəhg-ipən Iaihlua min tahmen e Taetas. ⁵ Məto emotən-iahau ilat məsotolən mamə rəhalat nəghatən otər maprəkis-in rəhatimat. Kən itimat emotaskəlim əskasik nəghatən pahrien tətətig e Namnusən Təwir, mamə itəmat onəkotitun wır.

⁶ Kən netənim neen əh-ikin katən ilat mamə ilat netəm-iasol min rəha niməfak, (məto e nehmən rəhak, etəm tatos nərig asol, ne etəm təsosən nərig asol, ilau kuahmen ahmen əm. Kən e niganəmti Uhgın, in təsəfinən nərig min əh). Kən netəm min əh kəməsotəgətunən io e nəghatən wi kit, mamə ekuwın mamnus-iarəp. ⁷⁻⁸ !Kəpə! Kəməsotolən, məto-inun ilat kəmotitun əm mamə, e nəsanənən rəha Uhgın, in təmiləs-ipər io mamə io aposol, kən mitahləpis-pən io mə ekuwın mən-iarəp Namnusən Təwir kəm Iaihlua min. Kən e nəsanənən əh, tiniləs-ipər rəkis mihin Pita, mamə in min in aposol. In otatən-iarəp Namnusən Təwir kəm netəm Isrel.

⁹ Kən Jemes ne Pita* ne Jon, katən iləhal məmə nəukəti niməfak miləhal. Nian kəməhaləplan, kən məhalitun məmə e nəwɪrən rəha Uhgɪn, in təmos-ipa wək u e nelmək. Kən kəhaluwa məhalol sekhan etimlau Panapas məmə itimat ekotol əm kitiah. Kən emotən mə oekotoor wək min. Itimlau oekian muamnus-iarəp Namnusən Təwɪr kəm Iaihlua min, kən iləhal okəhaluwɪn məhalən-iarəp kəm netəm Isrel. ¹⁰ Kən ilat kəmotən-ipa əm nəghatən kitiah əm məmə nikitimlau otəkəike matəht ian-rat min əpəh Jerusalem məmə ekuasitu elat. Məto, nɪkɪk tɪnagien rəkis o wək əh.

Pol təməhai Pita

¹¹⁻¹⁴ Kən uarisig un, emitəlig-pən əpəh ləhau taon kit Antiok. Nian emətətig ikin əh, kən Pita təmuarisig min muwa. Kən Pita təmətagwən ilat in min neen koatəfak, məto ilat Iaihlua min. Kən nian netəmim min rəha Jemes, itəm kəmotisi-pən Jerusalem motiet-arəpa, ilat kəmotəhai Pita, motəmə, “Iaihlua min u, okəike kəhg-ipən ilat. Məto okəmə kəsələn, Uhgɪn okol təsasituən elat.” Kən nəghatən u kəmoatən təmərəkɪn Pita, mol taulis kən məgin nuwɪn minən magwən təlmin netəm kəsəhg-ipənən ilat. Kən nolən rat əh Pita təmol, miuw e kitat min neen əpəh Antiok, ilat iəfak min u noanol min rəha Isrel, ilat min kəmos o Pita moatol nolən rəha etəmim itəm tatəghat e nolən kəiu, kən moatəgin netəm kəsəhg-ipənən ilat. Motətig kiuw min e Panapas, təgin min ilat. Kən e nian eməplan məmə ilat kɪnəsotətəu-pən ətuatipən

* **2:9:** Nəghatən Kris ətuatip tatən nərgi Pita ikin-u məmə, “Sifas.”
2:10: Wək 11:29-30

suatip itəm Namnusən Təwır tatən, kən eməhai-pən əm Pita e niġanəmtilat, matən-ipən əskasik məmə, “Nat əpnapin ik etəm Isrel, məto nəsosən əh rəhatat nolən. ?Kən tahro natəkəike kəm netəm min u kəsəhg-ipənən ilat məmə okəhg-ipən ilat?”

Etəmin itəm otatəhətə e Iesu, Uhgın in otasitu lan

¹⁵ Kən e nian əh, io emən-ipən wır kəm Pita məmə nipahrienən məmə itimlau emiasipən ətuatip e noanol rəha netəm Isrel. Itimlau sənəmə Iaihlua mil itəm netəm Isrel nikilat tataht məmə ilat rafin nol təfagə məto-inu kəsotətəu-pənən e lou. ¹⁶ Məto roiu ekiatun məmə Uhgın təsəfinən etəmin kit məmə in tətəuətəp e niġanəmtin məto-inu in tatətəu-pən ətuatip Lou rəha netəm Isrel. Etəmin itəm tətəhətə pahrien e Iesu Kristo, in əmun tətəuətəp e niġanəmti Uhgın. Nətəligən əh in əh, tol itimat min netəm Isrel, oekotəkəike motəhətə əm e Iesu Kristo məmə ekotətəuətəp e niġanəmti Uhgın. Uhgın təsəfinən itimat məto-inu ekotətəu-pən Lou, məto in tətəfin əm itimat məto-inu ekotəhətə e Iesu Kristo. Etəmin kit okol təsətəuətəpən e niġanəmti Uhgın məto-inu in tatətəu-pən pik Lou.

¹⁷ Itimat u netəm Isrel, kən ekotəhətə e Iesu Kristo məmə ekotuwa motətəuətəp e niġanəmti Uhgın. Məto netəm Isrel neen, nikilat tataht məmə itimat nol təfagə məto-inu esotətəu-pənən lou. ? Tol nəhlan, in Kristo itəm tatol məmə itimat nol təfagə, o kəp? !Kəp! Sənəmə tol min nəhlan.

¹⁸ Məto təfagə pahrien in tol min nulan, okəmə ekitəlig-pən min matətəu-pənən lou. Okəmə ekatol min nəhlan, kən io esətəuətəpən e niġanəmti Uhgın.

Nolən əh tatəgətun əsas əm məmə io iol təfagə rat. ¹⁹⁻²⁰ Tol nəhlan məto-inu, nian emalkut pik o nətəu-pənən Lou, kən eməplan məmə nolən u təsahmenən məmə tatol io ekətuatip e niganəmti Uhgın. Tol nəhlan, emapəs nətəu-pənən Lou o nuwamən etəm ətuatip. Tahmen məmə emimis, kən roiu e nəmegəhən wi rəhak, Lou təsərəmərəən lak. Emol nəhlan məmə ekol əm nətəligən rəha Uhgın. In tahmen məmə itımlau Kristo, kəmətu-pər itımlau min e nig kəməluau. Nəmegəhən oas rəhak təmimis. Məto emaiir-pa min itımlau Kristo. Kən roiu u, sənəmə io iatəmegəh, məto Kristo in tatəmegəh e nıkik. Kən e nəmegəhən rafin rəhak, ekətahətətə əm e Nəti Uhgın, itəm təmolkeike pik io, kən muwa mımıs mos megəh io. ²¹ Nolkeikeən u, Uhgın təmawte-in-pa kəm itat, in iahgin pik. Kən okol esərəkinən nolkeikeən əh itəm Uhgın təmawte-in-pa əpnarın əm. Məto iatəplan məmə itəmat min neen, nəkoatətəu-pən Lou mə otol itəmat nəkotətuatip e niganəmti Uhgın. Məto okəmə nəkoatol nəhlan, kən itəmat nəkotol nat əpnarın əm e nımısən rəha İesu Kristo

3

Netəm Kalesia kəmotapəs suatip

¹ !Netəm Kalesia, itəmat nınotalməl pik! ?Pah təmasig itəmat matuwın e suatip eko-eko nəhlan? Emotən-iarəp wir pap kəm itəmat məmə İesu təmos nəhməən e rəhan nımısən otəmat, məto tahro? ?Okəm-naka suah kit təmos-ıpən-os-ıpən kəm itəmat kən miuw rəkıs itəmat mol itəmat nınotalməl pik? ² ?Otən-tu kəm io məmə, Uhgın

tamos-ipinā Narmin Rəhan kəm itəmat məto-inu itəmat nakotətəu-pən Lou, o kəp? Kəpə, in təmos-
ipinā kəm itəmat məto-inu itəmat nakotahatətə e
Namnusən Təwir rəha Iesu Kristo. ³ ?Tahro? ?
Nakotalməl pik nəpo lan? Itəmat nəmotətuoun wir
nəmegəhən wi rəhatəmat e Iesu Kristo e nasituən
rəha Narmin Rəha Uhgın, kən məto roiu, itəmat
nınotalkut məmə onəkotapəs, kən motuwa netəm
ətuatip e rəhatəmat əm nəsanənən. ⁴ Nəmoatəto
nahməən tepət məto-inu nəmotahatətə e Nam-
nusən Təwir. ?Nəmotəto nahməən əh əpnəpın əm?
Kəp, nahməən əh sənəmə rəha nat əpnəpın əm.
⁵ Narmin Rəha Uhgın təməsolən nat pispis min
kəm itəmat məto-inu nəkoatətəu-pən Lou. In təmol
məto-inu itəmat nəmotəto Namnusən Təwir rəha
Iesu Kristo kən itəmat nakotahatətə lan.

Nətəu-pənən Lou, ne nahatətəən e Iesu

⁶ Otətəligin-tu nat kit oekən. Suah kit, Epra-
ham, itəm Naoa Rəha Uhgın təməghat-in-iarəp
rəkis minu lan məmə:

“Epraham in təmahatətə əskasik e Uhgın, kən tol
nəhlan, Uhgın təməən məmə in tətuatip e
niganəmtin.”

⁷ E suatip kitiəh əm, netənim itəm koatahatətə
e Uhgın, in tətəfin ilat məmə kotahmen e noanol
ətuatip rəha Epraham.

⁸ Naoa Rəha Uhgın təməən rəkis aupən məmə
Uhgın otos Iaihlua min, kotuwa ron mol ilat
kotətuatip e niganəmtin e nahatətəən rəhalat.
Aupən, Naoa Rəha Uhgın təməən-iarəp nəghatən wir
kit kəm Epraham məmə:

“Otisi-pən e rəham noanol, kən ekawte-in rəhak nəwīrən e netəmim rəha noanol mīn rafin e nətueintən.”

⁹ Kən Uhgīn təmawte-in rəhan nəwīrən kəm Epraham mətō-inu in təmahatətə əskasik lan. E suatip kitiah mīn əm, Uhgīn titun nawte-inən nəwīrən kəm netəmim itəm koatahatətə pahrien lan.

¹⁰ Mətō netəmim mīn un, itəm nikilat tatəht məmə ilat okotos nəmegəhən mətō-inun ilat koatətəu-pən rafin nat naka itəm Lou tatən, netəm mīn əh, ilat kīnotatig rəkis e nelmi nərətən. Tahmen-pən əm e Naoa Rəha Uhgīn tatən məmə:

“Netəmim itəm kəsotol ətuatipən natimnat mīn rafin itəm kotatig e naoa rəha Lou, ilat kīnotatig rəkis e nəlmi nərətən, kən okotəkəike motos nalpīnən kit.”

¹¹ Kən tol nəhlan, tətuatip əm o kitat məmə suah kit tikə itəm tatuwa tətuatip e niganəmti Uhgīn mətō-inu in təmətəu-pən Lou, mətō Naoa Rəha Uhgīn tatən min-nulan məmə:

“Etəmim itəm tətahatətə e Uhgīn, in tatuwa tətuatip e niganəmtin, kən in otos nəmegəhən pahrien.”

¹² Nəghatən əh, tatəghat-in nahatətəən rəhatat e Uhgīn. Nolən rəha nətəu-pənən Lou, in təsahmen-ahmenən e nolən rəha nahatətəən e Uhgīn. In əh, mətō-inu nolən rəha nətəu-pənən Lou, tahmen-pən əm nulan, Naoa Rəha Uhgīn tatən məmə:

“Etəmim itəm tolkeike məmə otos nəmegəhən pahrien mətō-inu tatətəu-pən ətuatip Lou,

in otəkəike mol natimnat min rafin agin itəm Lou tatən.”

¹³ Netəmim rafin agin kəsotol ətuatipən nat naka itəm Lou tatən. Tol nəhlan, Lou in təmələhəu nalpınən tətətig o kitat rafin, kən kitat rafin kotatig e nəlmi nəratən. Məto Iesu Kristo təmimis e nig kəməluau, kən miuw rəkis kitat e nəlmi nəratən əh. Iesu in təmos nalpınən otat tahmen-pən əm e Naoo Rəha Uhgın tatən məmə:

“Etəmim kit, itəm kəməhamnu kətu-pər e nig, nolən əh tatəgətun-pən məmə Uhgın in təmol nalpınən kəm in.”

¹⁴ Məto roiu, Iesu təmimis nəhlan məmə netəmim əpnəpın min rafin, ilat okotatig e nəwırən itəm Uhgın təmən kəm Epraham məmə, in otosipən kəm noanol min rəhan. Kən nat əh tol nəhlan məmə inu roiu kitat netəm kotahətətə e Iesu, kitat kotitun nosən Narmin Rəha Uhgın itəm Uhgın təmən məmə otosipən kəm netəmim.

Uhgın təmaupən mol nəniəkisən rəhan, məto Lou təmuarisig təsafələn

¹⁵⁻¹⁶ Piak min ne winik min, e nəmegəhən rəhatat, kitat kotitun nolən u rəha nəniəkisən. Nian suah kit tatol, okol kəsafələn, kəsətu-pənən kit min. E suatip kitiəh əm, Uhgın təmol nəniəkisən kit kəm Epraham o rəhan kit noanol. Kən e nəghatən əh, təməsənən məmə Uhgın təmən-iəkis noanol min rafin rəha Epraham, məto təmən əm məmə etəmim kitiəh əm otisi-pən e rəhan noanol, etəmim u, in Iesu Kristo. ¹⁷ Kən rəhak nəghatən, nipətin tol nulan məmə, aupən, Uhgın təmən-iəkis məmə

otətaskəlīm nəghatən rəhalau Epraham, məto uarisig nup fo-hanrit-tate təmuwīn rəkis, kən Lou təmuwa. Məto Lou əh, okol təsərəkinən nəghatən itəm in təmən kəm Epraham, okol təsafələn nəniəkisən rəha Uhgīn. ¹⁸ Kən okəmə kitat kotatig e nəwīrən rəha Uhgīn məto-inun kitat koatətəupən Lou u, tatəgətun-pən məmə nəniəkisən itəm Uhgīn təmol aupən in nat əpnapīn əm. Məto təsolən nəhlan. Məto-inu kitat kotəplan Epraham in təmətatig e nəwīrən mīn rəha Uhgīn məto-inu in təmaskəlīm-iəkis nəniəkisən rəha Uhgīn.

Lou rəhan əh-ikīn wək

¹⁹ Suah kit otəpanətəpəh məmə, “? Okəmə tol nəhlan, kənu Uhgīn təmos-ipən Lou kəm Moses o naka?” Kən ekītun nənən kəm itəmat u-roiu məmə nəniəkisən itəm Uhgīn təmol kəm Epraham in təmaupən matig, məto Lou in təmuarisig in. Təmuwa məmə otəgətun əm kitat netəmim məmə okotītun məmə kitat nol təfagə rat. Məto Uhgīn təmələhəu Lou əh məmə otatig matuwīn matuwīn mətoarus etəmim u noanol rəha Epraham otaiir-pa otat. Kitat kotītun məmə Lou əh, rəhan wək təwīr, məto nikitat otəkəike matəht məmə Lou əh, Uhgīn təmaupən mos-ipən kəm nagelo mīn, uarisig təpanos-ipən kəm etəmim kit u Moses. Moses, in suatip o nos-ipa mīn Lou kəm itat. Məto nian Uhgīn təmol nəniəkisən ilau Epraham, təməsolən nəhlan. ²⁰ Uhgīn in təməsolən suatip kit məmə suah un otəghat kəm Epraham. Məto in ətuatip əm təməghat mən-ipən nəniəkisən rəhan e nīganəmti Epraham.

21 Kən sənəmə Lou əh təmuwa mə otərəkın nənəkisən rəha Uhgın. Kəpə, təsolən nəhlan. Okəmə Lou titun nos-ipamən nəmegəhən wi kəm kitat, kən kitat kapotıtun nuwamən kətuatıp e nıganəmti Uhgın. Məto təsol mihinən. 22 Məto Lou kit tol nəhlan tikə. Məto-inu Naoa Rəha Uhgın tatən məmə nolən rat təməlis rafin kitat. Kən kitat rafin koatətğəhl Lou mın. Tol nəhlan məmə, suatıp kitiəh əm məmə kitat okotos nəwırən mın rəha Uhgın itəm təmən-ıəkis rəkis. Kən suatıp u məmə koatahatətə e İesu Kristo.

Nian u-roiu rəha nahatətəən e İesu Kristo

23 Aupən, Lou itəm Uhgın təmos-ipən kəm Moses, in təmataskəlım kitat tiəkis, tahmen əm mə kitat kəmotatıg e kalapus, mətoarus-pa u-roiu, Uhgın təmerəh e nıganəmtıtət kotəplan suatıp rəha nahatətəən. 24 Kən Lou əh, in tahmen əm e etəm-iasol kit itəm təmatərəmərə etat, muwa mətoarus-pən nian Kristo təmuwa, məmə e nian əh, kitat kınotuwa motəuatıp e nıganəmti Uhgın, məto-inun, kitat kəmotahatətə lan. 25 Məto roiu əh, Lou okol təsərəmərə mınən etat, məto-inun nian rəha nahatətəən e İesu Kristo tınəmuwa rəkis.

İtəmat rafin kitiəh əm e İesu

26 Kən məto-inun itəmat nəmotahatətə e İesu Kristo, itəmat rafin, nenəti Uhgın mın. 27 Kən kınol baptais rəkis etəmat, məmə itəmat nako-tuwa motol kitiəh itəmat mın. Tol nəhlan məmə, itəmat nınotos nolən wır mın rəha İesu tahmen əm məmə nəmotalpın nıpətıtəmat e natımmat wi. 28 Kən itəmat rafin ağın nəmotuwa motol kitiəh

itəmat Iesu Kristo, kən itəmat rafin ninotahmen əm. Təwīr məmə kitat kəsotoor minən netənim, nat əpnapīn okəmə in etəm Isrel o in Iaihlua kit, in slef kit o in sənəmə slef kit, in iərman kit o in pətan kit. ²⁹ Itəmat rafin netənim rəha Iesu. Tol nəhlan, itəmat noanol min pahrien rəha Epraham. Kən e suatip kitiah əm, nəwīrən min itəm Uhgīn təmən- iəkis kəm Epraham, itəmat onəkotos motatig lan.

4

Kitat nenəti Uhgīn

¹ Roiu əh, oekəghat məsīn min e nolən rəhatat, oekən muəh nimaa nəghatən lan. Okəmə suah kit, in otimis kənu nətin in otos rəhan nəwīrən min rafin, məto okəmə nətin tatəkəku əh, kənu kol təsosən nəwīrən rəhan. Nətin tahmen əm e slef kit, nat əpnapīn rəhan nəwīrən min rafin. ² In otəkaike mətatig əm e nelmi rəhan min, tatuwin matuwin mətoarus-pən nian rəhan tata təmən in minitun nosən natimnat min itəm rəhan tata təmələhəu kəm in. ³ Kənu kitat min kotahmen-pən əm nəhlan. Aupən kitat kotahmen əm e suakəku əh. Kitat slef min rəha iərmis min itəm kəmoatərəməərə etat. ⁴ Məto tinuwa e nian ətuatip itəm Uhgīn təmən, kən Uhgīn təmahl-ipa nətin tuwa, pətan kit təmiləs taiir-pa e nətueintən, kən in matətəu-pən wīr natimnat rafin itəm Lou in tatən. ⁵ Təmol nəhlan məmə otikis rəkis kitat u, Lou təməlis ətain itat, kənu Uhgīn otəhl kitat, miləs-irəkis kitat tahmen əm e nenətin ətuatip min.

⁶ Kənu roiu əh, Uhgīn tolkeike məmə in otol pəs kitat kotitun məmə kitat nenətin min, təmahl-ipa

3:28: Rom 10:12 **3:29:** Rom 4:13 **4:3:** Kol 2:20 **4:5:** Jon 1:14; Rom 1:3

Narmin rəha Nətin təmuwa e nikitat min rafin, kən matol itat kotaun-in Uhgın məmə, “Tata.” ⁷ O nat əh, kitat sənəmə slef min əm, məto kitat nenəti Uhgın pahrien min. In tatos-ipa natımnat wır min kəm kitat, itəm in tınəmən rəkis məmə otos-ıpən kəm nenətin min.

Pol nikin tıtahmə o netəm Kalesia

⁸ Aupən itəmat nəmotəruru Uhgın. Itəmat nəmoatəfak əm iərmis min məmə rəhatəmat uhgın min, ilat kəmotəlis ətain itəmat, məto ilat sənəmə ilat uhgın pahrien min. ⁹ Məto roiu əh, ninotıtun Uhgın. O təwır ilə məmə ekən nəhlan məmə Uhgın tınıtun rəkis itəmat. ?Məto ekolkeike məmə ekətapəh-tu otəmat məmə nəkotıtəlig-pən min o iərmis min o naka? Rəhalat nəsanənən tikə, kənu kol kəsotolən-ta nat wır kit kəm itəmat nian kit ne. Təhrol nakotəmə ilat okoatəlis min itəmat? ¹⁰ ? Təhrol itəmat nakotətəu-pən nətuakəmən rəhalat e nian min rəhalat, ne məwıg min rəhalat, ne nian asim min, ne nup min rəhalat o naka? ?Nikitəmat təht məmə okol Uhgın nikin tagien otəmat ron? ¹¹ ! Kəsi nəman! !Io ekatəgin agin otəmat! !Ekatəplan mə emol wək pik etəmat o nat əpnapın əm!

¹²⁻¹³ Piak min ne winik min, io ekatən əskasik kəm itəmat məmə, aupən itəmat nəməsotatigən e Lou kit, kən io emuwa mehm itəmat koatətig, emos nolən rəhatəmat. Eməsətəu-pənən Lou. Kən roiu, ekolkeike məmə itəmat min onəkotos nolən rəhak, ekəsolən məmə Lou otaskəlim pik io tiəkis. Itəmat nikitəmat təht u, aupən nian io ematən-iarəp Namnusən Təwır kəm itəmat, məto-inu nimisən rəhak təmol, kən ekətatig kitat min

itəmat. Məto nat əpnapın məmə io ematimis e nian əh, məto itəmat nəməsotolən io ekəto tərat. ¹⁴Nimisen rəhak təmaləkiamtə itəmat, məto itəmat nikitəmat təməsəht ratən io, kən məsotən ratən io. Itəmat nəmoatos wır io moatuwin e nıpəg noanimə min rəhatəmat, təhmen əm məmə io nagelo kit rəha Uhgın, o io, io Iesu Kristo.

¹⁵Aupən, itəmat nəmoatolkeike pık io, eməplan məmə okol napotıtun nolən nat u, napotos-iarəp əm niganəmtək u tərat, kawluin ilau itəm təwır kit rəhatəmat, pəs tasitu lak. ?Məto tınahrol əh-roiu? ¹⁶Nikik təht məmə, okəmə naka nəghatən min pahrien rəhak təmol itəmat nakotetəhau io.

¹⁷Iəgətun eiuə min un, koatalkut pık məmə onəkotəuhlin rəhatəmat nətəligən moatətəu-pən ilat. Məto ilat kəsotolən məmə otaşitu etəmat. Kotolkeike əm məmə okotiuw rəkis itəmat ron io məmə itəmat onəkotalkut pık o nətəu-pənən ilat. ¹⁸In nat təwır məmə nakotalkut pık o nolən natımnat, məto nəkotəkəike motalkut o nat itəm in təwır, nat əpnapın ekətatiğ kitat min itəmat, o esatiğən kitat min itəmat.

¹⁹Io min neen, io iatəto tərat ağın-əh otəmat təhmen-pən əm e pətan itəm məntaan tınatahmə məmə otəmək, matuwın matuwın mətoarus itəmat nakotos nolən ətuatıp rəha Iesu Kristo e rəhatəmat nəmegəhən. ²⁰Ekolkeike pık məmə ekətatiğ kitat min itəmat u-roiu məto-inu okəmə ekətatiğ, okol esagət pıkən etəmat. Məto roiu etatiğ isəu otəmat nəhlan, kən məruru mə ekəhrol nulan masitu etəmat.

Namsu rəha Heka ne Sera

21 Itamat netəm nakotolkeike pik nətəu-pənən Lou, onəkotuhalpın-tu rəhak nəghatən. ?Nəmotəto rəkis nat naka itəm Lou tatən, o nəsoətətoən əh? 22 In tatən Epraham itəm təmİLəs nətin iərman kəiu. Kit itəm slef rəha pətan rəhan təmİLəs, kən kit rəhan pətan ətuatip təmİLəs, sənəmə in slef mətəo pətan əh rəhan. 23 Suakəku itəm pətan slef təmİLəs in təmāiir e nətəlīgən əm rəha netəmim. Mətəo suakəku itəm pətan ətuatip əh rəhan təmİLəs, in təmāiir mətəo-inu Uhgın in tinəmən-iəkis rəkis məmə pətan əh otİLəs. 24-25 Kən kitat kotitun nənən namsu rəha pətan mil əh kən motəuhlin-pa nīpətin etat. Pətan mil əh ilau katuəgətun nənən mil itəm Uhgın təmōl kəm netəmim. Pətan u Heka, in ne nətin mīn ilat slef mīn əm, okətāləkīəmtə ilat. Kən pətan əh Heka, in tahmen e nənən itəm Uhgın təmōl e nītōt Sinae əpəh e nītən asol Arepia, ikin əh inəh Uhgın təmos-īpən Lou ikin kəm Moses. Kən in tahmen mīn e taon asol kit u Jerusalem itəm netəm ikin kotaskəlīm əskasik Lou, kən ilat kotahmen e slef mīn itəm Lou tatəlis ətain ilat. 26 Mətəo Jerusalem kit mīn əpəh ilis e neai, in tahmen e pətan itəm sənəmə slef, itəm Lou təsəlīs ətainən, kən in mama rəhatat. 27 Inu nəghatən kit e Naoa Rəha Uhgın tatən nəhlan məmə,

“!Ik u inu, nīməgi-nig, agien!

Ik u inu, nəməsətoən nahməən kit o neməkən, agət əfəmə, mətəo-inun nīkim tətagien!

Ik nəməsiləsən suakəku nian kit ne, mətəo roiu əh, nenətim mīn tinol tepət tepət agin,

4:22: Jen 16:15; 21:2
Nol Əpən 21:2,10

4:23: Rom 9:7-9

4:26: Hip 12:22;

taprækis-in nenæti pætan itəm rəhan iərman tæsapəsən.”

²⁸ Piak min ne winik min, itəmat nenæti Uhgîn min mæto-inun təmən-iækis məmæ otol mihin. Itəmat onəkotahmen e Aisak u aupən, næti Sera.

²⁹ Kən aupən suakəku u Ismael, næti Heka, itəm təmair e nətəligən əm rəha netəmim, in təmatərəkîn pik suakəku u Aisak itəm təmair e wək rəha Narmîn Rəha Uhgîn. Kənu roiu ne, nolən əh tatuwin əm nulan, ilat itəm slef rəha Lou koatərəkîn kitat itəm kəmotair wi e Narmîn Rəha Uhgîn e nahatətəən. ³⁰ ?Mæto Naoa Rəha Uhgîn təmən məmæ naka? In təmən məmæ,

“Ik onakəkəike mahl-iarəp pætan un slef ne nətîn.

Ilau kuagim rækis u ikin-u, mæto-inun, næti pætan əh, in okol təsosən nəwirən kit rəha tata. Nəwirən min rafin rəha tata otuwîn kəm næti pætan itəm sənəmæ slef.”

³¹ Mæto kitat u, kitat sənəmæ nenæti pætan slef, kitat nenæti pætan itəm sənəmæ slef.

5

Iesu təmikis rækis rəhan min netəmim

¹ Nian Iesu Kristo təmikis rækis itat, təmol kitat məmæ Lou təsəlis ətainən kitat. O nat əh inəh, itəmat onəkotəike motətul əskasik. Sotətəu-pənən Lou, məmæ otərəmərə etəmat. Lou əh, titaləkiamtə itəmat, məmæ itəmat onəkotuwîn motol wək min rəhan.

² Otətəlig-in-tu io. Io Pol iatən nəghatən u kəm itəmat. Okəmæ itəmat onəkotegəhan məmæ ilat okotəhg-ipən itəmat, kənu nat u itəm Iesu təmol

təsasitu aɡinən etəmat. ³ Kən io iatagət əskasik otəmat məmə etəmim itəm otegəhan məmə okəhg-ipən in, in otos-ipən atip əm in e nelmi Lou. Kən etəmim itəm tətətig e nelmi Lou, otəkəike matətəu-pən rafin aɡin natimnat min itəm Lou tatən məmə otol. ⁴ Itəmat u, itəm nakotalkut-alkut o nətəu-pənən Lou məmə otol itəmat nəkotətuatip e niganəmti Uhgın, itəmat ninotəte rəkis atip itəmat o Iesu Kristo. Itəmat ninotəhən-ipən rəkis məntaatəmat o nəwırən rəha Uhgın. ⁵ Kən məto kitat u, okotələhəu-pən əm rəhatat nətəligən e Uhgın, pəs in otol kitat kotətuatip e niganəmtin, məto-inun kitat kotahətə əm e Iesu Kristo. Kən Narmin Rəha Uhgın, in otol itat koatətul əskasik kən motəshgin mətoarus nat un otiet-arəpa. ⁶ Nian kitat kotuwa motakul-pən e Iesu Kristo, nat əpnəpin okəmə etəmim kəməhg-ipən o kəsəhg-ipənən, məto nat asol un, in rəhatat əm nahatətəən e Iesu Kristo. Nahatətəən əh, in tol kitat kotalkeike Uhgın, motətig katol min nolkeikeən kəm netəmim min.

⁷⁻⁸ Aupən, eməplan itəmat kən mitun məmə itəmat nakotaiu əsanən e suatip ətuatip e nəmegəhən rəhatəmat, məmə nakotətoarus mak, məto roiu, nəmotitəlig. Uhgın təmaun-in rəkis itəmat. ?Tol nəhlan, ekolkeike məmə ekətapəh-tu məmə, pah min kotaiuosig e rəhatəmat suatip, moatiuw kalin itəmat məmə onakoatətəu-pən min Lou? !Ekitun məmə okol Uhgın təsən-iəhauən itəmat nəhlan!

⁹ In tahmen e nəghatən kit itəm katən nulan məmə, “Ilat kəmotis noanig rat kit, tinatəwiə, matərəkın nətəligən rəhatəmat.” ¹⁰ Məto ekitun

māmə nīpahrienən Iərəməərə in otol nətəligən rəhatəmat tuwa mīn mol kitīəh kitat mīn io. Kən io ekitun wīr māmə etəmim u itəm tatərəkīn rəhatəmat nətəligən nulan, nat əpnapīn in etəmiasol o in etəm ahrol kit, mətə Uhgīn otol nalpīnən kit kəm in.

¹¹ Piak mīn ne wīnik mīn, nəghatən neen itəm katən māmə io, ekatən-iarəp əh māmə netəm kəmotahatətə e Uhgīn okəike kəhg-īpən ilat māmə Uhgīn otasitu elat. Mətə nəghatən əh, sənəmə nīpahrienən. Okəmə io ekatən-iarəp nəhlan, kən netəm mīn u itəm koatan itəmat mīn ilat, nīkilat otagiən əm ron io. !Mətə otəplan-tu! Netəm Isrel neen, koatərəkīn əh io, koatitəp io, moatoh io, mətə-inun io iatən-iarəp māmə nīmīsən rəha Iesu e nig kəməluau, in əm un, in otosmegəh kitat. ¹² ! E rəhak nətəligən, netəm mīn un itəm koatərəkīn nətəligən rəhatəmat moatən māmə okəike kəhg-īpən itəmat, təwīr māmə ilat okotuwin motətə-atīp ilat mīn!

¹³ Mətə piak mīn ne wīnik mīn, Uhgīn təmaun-in itəmat, kən mīkīs rəkīs itəmat, māmə Lou itəm Uhgīn təmos-īpən kəm Moses in otəsəlisən itəmat. !Otətə wīr itəmat! Nīkitəmat otəsəhtən māmə, “Təwīr, io enagīm rəkīs e Lou əh. Roiu əh, io ekitun nolən natimnat rafin itəm nīkīk tolkeike.” Itəmat, onakəsotənən nəhlan. Mətə nolkeikeən rəhatəmat otəkəike mol itəmat nīkitəmat tagiən māmə onəkotasitu etəmat mīn.

¹⁴ Nolən əh, in tatətəu-pən wīr nəghatən kit rəha Lou, u itəm titargəfimīn rafin nəghatən pīsīn pīsīn mīn rəha Lou, in tatən māmə, “Ik, onakolkeike

netəmim rafin, kən matol təwir kəm ilat, tahmen əm mə ik nakatol atip kəm ik.” ¹⁵ Itəmat onəkotəkəike katəto wir itəmat. Okəmə itəmat nəkoatol tıməht kəm itəmat mīn, nəkotahmen əm e kai mīn, koatus atip əm ilat mīn, kən nəghatən rəhatəmat otərəkin itəmat.

Nolən rəha Narmīn Rəha Uhgīn ne nolən rəha netəmim

¹⁶ Io, ekolkeike mə ekən nəghatən kit kəm itəmat. Itəmat, Narmīn Rəha Uhgīn otəkəike matit itəmat kən itəmat nakotətəu-pən, kən itəmat məsotosən nolən rat aupən rəhatəmat, itəm nəmotos kaiir-pa. ¹⁷ Nolən rat aupən əh, inun, nəkoatol natimnat tərət itəm nikitəmat tolkeike. Məto nolən əh, in tetəhau nolən rəha Narmīn Rəha Uhgīn. Kən Narmīn Rəha Uhgīn in təsolkeike mīnən nolən rat aupən kəmos kaiir-pa moatol. Nolən mil əh kətioal təməht kəm ilau mīn, kən tatol məmə nəkəsotolən nolən wir mīn itəm nakotolkeike məmə onəkotol. ¹⁸ Sotaluinən nat kit, okəmə Narmīn Rəha Uhgīn tatit itəmat, kənu Lou in təsəlis ətain mīnən itəmat.

¹⁹ Kitat kotitun əm nolən rat aupən rəha netəmim itəm kəmos kaiir-pa moatol. Nipitan ne nəman ne, koatit anion ilat mīn; kən ilat koatol nolən rat rafin itəm tol naulisən o nənən; rəhalat nətəligən tatuwin pik o nolən rat mīn əh. ²⁰ Ilat koatəfak kəm narmi nat mīn, moatəmik nərik, moatos təmafah rat mīn, moatol kilepa, ne. Kənu moatol mīn tıməht, moatəμου, moatetet, moatol neməha, moatos-ipər atip əm ilat, moatoor ilat mīn, kən okəmə rəhalat nətəligən tol pisin pisin,

kən ilat koatəhai ilat m̄in. ²¹ N̄ikilat tətakl̄əh-in nat̄imnat rəha netəm p̄is̄in, moatən̄im nən̄imən m̄in kət̄ap̄is lan, kən moatol lafet katagien lan o nolən nat tər̄at m̄in əm, moatol m̄in nat̄imnat t̄ep̄ət m̄in tol n̄əhlan. !Iatən m̄in tahmən-pən əm m̄əm̄ə emən aupən m̄əm̄ə, oat̄əto w̄ir it̄əmat! M̄əto netəm koatol nolən m̄in əh, okol ilat k̄əsotuwamən motat̄ig ahgin n̄ərəm̄ərəən Rəha Uhḡin it̄əm tatol əpen-əpenə lan.

²² M̄əto noa Narmin Rəha Uhḡin it̄əm tatəwiə e n̄əmegəhən rəha netəmim rəha Uhḡin, in tol nulan. Ilat koatolkeike netəmim, kən n̄ikilat t̄ətagien, k̄ənu n̄əm̄əlinuən t̄ətat̄ig e n̄ikilat, kən r̄əhalat n̄ət̄əl̄igən kaif̄əm̄əh, kən moatasək̄itun et̄əmim, kən r̄əhalat nolən in t̄əw̄ir t̄əw̄ir. Kən netəmim kot̄itun m̄ə ilat netəm ətuat̄ip, koatol noa. ²³ Kən ilat netəm m̄ət̄ig. Kən nian n̄ət̄əl̄igən rat tat̄ig elat, ilat kot̄ətul əskasik, m̄əsotolən nat̄imnat rafin it̄əm ilat at̄ip kotolkeike nolən. Nolən m̄in u, ilat kot̄əw̄ir p̄ik, kən n̄əghatən kit t̄ik̄ə o Lou kit, m̄əm̄ə otən-iəhau it̄əmat m̄əm̄ə on̄ək̄əsotolən nat̄imnat m̄in əh. ²⁴ Kitat u netəm rəha Iesu Kristo, kitat k̄in̄əmotap̄əs r̄ək̄is nolən rat m̄in r̄əhatat, u k̄əmoatol nat̄imnat m̄in it̄əm n̄ət̄əl̄igən əm r̄əhatat tolkeike. Tahmen əm nulan m̄ə, k̄əm̄əht-ipən n̄ət̄əl̄igən rat m̄in r̄əhatat e nig k̄əm̄əluau.

²⁵ !Kot̄əplan-tu! Narmin Rəha Uhḡin in t̄əmos-ipa r̄ək̄is n̄əmegəhən kit k̄əm̄ə kitat, kən t̄əw̄ir m̄əm̄ə kitat okotaliw̄ək e nolən w̄ir m̄in r̄əhan. ²⁶ T̄ər̄at m̄əm̄ə kitat okotausit motos-ip̄ər p̄ik kitat, motiuw-p̄ər n̄əratən, moatetet kitat m̄in.

6

Təwir məmə kotasitu e katipa əfigəm rəhatat mın

¹ Piak mın ne winik mın, okəmə itəmat kit təme e rəhan nəmegəhən, təwir mə itəmat un, Narmin Rəha Uhgın tatit itəmat, onəkotəkəike motasitu lan motəg-ətuatip-in. Məto onəkəsotagət pikən lan, onəkotəghat mətig əm kəm in, motol məmə nikitəmat mın titahmə ron. Məto otəto mın itəmat, məmə nat kitiəh əm itəm itəmat nakotən-iəhau etəmim ron, otəseko-pa mınən otəmat. ² Itəmat onəkotasitu nəhlan etəmat mın. Onəkotalis kələh nat əfigəm rəhatəmat mın. Okəmə nəkotol nəhlan, kən itəmat nakotətəu-pən wir nat naka itəm Lou rəha Kristo tatən. ³ Təsəwirən məmə kitat okotosipər atip kitat. Okəmə suah kit nikin tatəht mə “Io, io etəm agin-əh kit,” etəmim un, nikin tateiuə-in, məto in təruru məsəplanən məmə in nat əpnarın əm. ⁴⁻⁵ Məto itəmat onəkotəike motəplan wir-tu natimnat itəm noatol mın. Tol nulan məmə, okol etəmim kit in təsakil atipən rəhan wək ne wək rəha suah kit mın. Məto in otəkəike mehm wir rəhan pisin əm wək aupən. Məto-inun, netəmim rəhalat wək mın tol pisin pisin. Kən ilat koatos katipa əfigəm pisin pisin mın e nəmegəhən rəhalat kitiəh kitiəh. Məto təwir məmə etəmim kitiəh nikin otəgien o rəhan wək, okəmə rəhan wək təwir əm.

⁶ Itəmat u, təwir məmə itəmat onəkotawte-in natimnat mın neen kəm rəhatəmat nəgətun mın, itəm koatəgətun itəmat e nəghatən rəha Uhgın.

⁷ Oatəto itəmat, soteiuə-in atipən itəmat mın məmə itəmat nəkotitun nolən nat əpnarın kit

itəm nikitəmat rat aupən nakotolkeike. Kən okol nəkəsotolən ialmə e Uhgın. Ik nəmis noanig naka e rəham nasumən, kən ik onakəhl atip mın noan, mun. ⁸ Etənim itəm tatasum-in nolən rat aupən, itəm kəmos kair-pa moatol, tahmen e noanig rat e rəhan nəmegəhən, in otəkəike məhl noan tərət mun, kənu noanig un, otoe-in, nıpətın u, Nımısən. Məto etənim itəm tatis noanig wır, itəm Narmin Rəha Uhgın təmos-ipən, Narmin Rəha Uhgın otol toe-in, noan wır kit, kən in otəhl. Nərgın noanig un, in Nəmegəhən Lilin itəm namnun tikə.

⁹ Sotərou-inən nolən itəm təwır, məto-inu kitat okotəhl noanig wır əh, e nian ətuatip rəhan, okəmə kəsotapəsən wək. ¹⁰ Kən nian mın rafin itəm kotitun nolən, pəs koatol təwır kəm netənim rafin, kən motatig katol tepət mın kəm netəm mın u kotahmen e piatat mın ne winitat mın e Iesu Kristo.

Namnun nəghatən rəha Pol təmən kəm ilat

¹¹ Oekəte rəkis namnun nəghatən rəhak e naoa e nelmək əm.* Itəmat onəkotəplan məmə leta mın rəhak, ilat iahgın mın. ¹² Netəm Isrel u koatən məmə okəike kəhg-ipən itəmat, ilat kotausit əm e niğanəmtilat mın neen o nat u. Məto ilat koatən nəhlan o nat kitəh əm, məmə netəm Isrel neen mın okəsotolən nəratən kəm ilat. ¹³ Kən ne nat kit mın, netəm mın əh, kotolkeike məmə okəhg-ipən itəmat məto-inu kotausit əm məmə okotol win etəmat lan. Kən motiuw kalın itəmat, nakotitəlig

6:8: Rom 8:13 * **6:11:** Nian Pol təməte naoa u, in təməghat, kən suah kit mın təməte rəhan nəghatən e naoa. Roiu in tatos pen, kən tatəte atip e nelmin.

motuwīn mīn e nelmi Lou rəha netəm Isrel. Məto otəplan-tu, ilat mīn kəsotətəu-pən wīrən natimnat mīn itəm Lou tatən. ¹⁴ Məto io rəhak, io ekəsən wi atipən io o nat kit itəm emol. Məto ekolkeike məmə ekənwiwi əm nat naka Iərəmərə Iesu Kristo təmol e nian in təmimis e nig kəməluau. O nat əh inəh, nolən mīn rəha nətueintən okol kəsotiuw rəkisən rəhak nətəligən, kənu netəm e nətueintən itəm kəsotahatətən e Uhgīn, ilat kəsotolkeikeən nolən itəm iatətəu-pən. ¹⁵ Okəmə Uhgīn in otol suah kit tuwa in etəm wi, kən in otol suah əh, tətuatip e niganəmtin, nat əpnəpīn okəmə kəməhg-ipən o kəsəhg-ipənən. ¹⁶ Kən roiu, ekatəfak o netəm mīn u koatətəu-pən wīr nəghatən u, ilat noanol ətuatip mīn rəha Uhgīn. Iatəfak məmə, pəs nəməlinuən rəha Uhgīn ne rəhan nasəkitunən otatig olat.

¹⁷ Rəhak u namnun nəghatən. Io esolkeikeən məmə suah kit otən mīn nat tərət lak. Məto-inun iatəmīk əh nəme nīməgəm itəm kəmaht io e kəpiel apīn kən kəmalis io. Nəme nīməgəm mīn u, tatəgətun məmə io, slef rəha Iesu.

¹⁸ Piak mīn ne wīnik mīn, iatəfak məmə Iərəmərə Iesu Kristo otawte-in rəhan nəwīrən otəmat. Əwəh.

North Tanna New Testament
The New Testament in the North Tanna Language of
Vanuatu
Le Nouveau Testament dans la langue du Nord Tanna
de Vanuatu

copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 22 Feb 2024 from source files dated 31 Aug 2023

46e9a2b5-26b8-5301-a079-623f3a20ef8b